

Жамият ислоҳига ҳисса қўшган зот



14:00 / 12.08.2022 1483

Мустамлакачиликнинг биринчи шарти ўзлигини таниган, озодлик, ҳурлик каби тушунчасини халқقا етказиши мумкин бўлган миллат зиёлиларини йўқ қилишдан иборатдир. Зиёлиларисиз қолган миллат эса тушунчаси саёз оломонга айланади. Бизнинг диёрларга рус мустамлакачилари бостириб кирганида ҳам айнан шу усул қўлланди. Жуда кўп зиёлиларимиз қатл этилди, омон қолганлари эса ватанини ташлаб кетишга мажбур бўлишди. Бошини кўтарган одам чопилаверди. Зиёлисидан айрилган халқ зулматда қолди. Инсонлар дин-диёнат деган тушунчалардан узоқлашди.

Юртимиз мустақилликка эришганидан кейин ҳам ҳаммаси ўз ўрнига тушиб кетиши осон кечмади. Миллат анча диндан узоқлашиб қолган эди.

Тўйларда ичкилик бўлиши одатий ҳол эди. Турли хурофот ва бидъатлар авж олган эди. Шундай қийин пайтда шайх Муҳаммад Содик Муҳаммад Юсуф раҳимаҳуллоҳ майдонга чиқдилар. У зотнинг ёзган китоблари миллатни ўзлигига қайтиши учун асосий омиллардан бири бўлиб хизмат қилди. Инсонлар ҳаром нима, ҳалол нима ўргана бошлишди.

Шайх ҳазратлари бу борада юздан ортиқ китоб ёздилар. Аллоҳ у зотнинг вактига барака берганини шундан ҳам билса бўлади. Шу ўринда кимдир «Бундан ҳам китоб ёзган адиллар бор-ку», деб эътиroz билдириши мумкин, лекин шайх ҳазратлари улардан фарқли равишда оғир ва мураккаб

замонда инсонларга динини ўргатдилар. Аксарият бадий асарлар ўша давр руҳияти ҳисобга олиниб, шунингдек, адібнинг ҳаёлоти, ички оламига таяниб ёзилади. Шайх ҳазратлари эса ёзган ҳар бир сўзларининг ортида катта масъулият турганини ҳис этишга мажбур эдилар, чунки у зот қандайдир бир асарни эмас, Исломни ёздилар. Динни баён қилиб бердилар. Дин эса – омонатдир. Инсонлар у китобларга қараб, ўзларини ислоҳ қилишлари, динларини комил қилишлари керак эди.

Хулоса ўрнида шуни таъкидлаб ўтмоқчи эдим. Шайх роҳимаҳуллоҳ Аллоҳнинг изни билан жамиятни ислоҳ қилишга катта ҳисса қўшган шахс. У кишининг дин йўлида қилган хизматлари беқиёс. Аллоҳ у зотдан рози бўлсин, шу миллатдан яна кўплаб олиму фузалолар чиқишини насиб этсин.

Авазбек Мирсайтов